

I. DISPOSICIÓN XERAIS

MINISTERIO DE TRABAJO E INMIGRACIÓN

6358 Orde TIN/831/2011, do 8 de abril, pola que se regula o taboleiro de edictos e anuncios da Seguridade Social.

A Lei 30/1992, do 26 de novembro, de réxime xurídico das administracións públicas e do procedemento administrativo común, establece, no seu artigo 45.1, o mandato ás administracións públicas de impulsar o emprego e aplicación das técnicas e medios electrónicos, informáticos e telemáticos, para o desenvolvemento da súa actividade e o exercicio das súas competencias, coas limitacións que, para a utilización destes medios, se establecen na Constitución e nas leis.

Pola súa vez, a Lei 11/2007, do 22 de xuño, de acceso electrónico dos cidadáns aos servizos públicos, consagra a relación coas administracións públicas por medios electrónicos como un dereito dos cidadáns e como unha obriga correlativa para tales administracións e, no seu artigo 12, dispón que a publicación de actos e comunicacións que, por disposición legal ou regulamentaria, se deban publicar en taboleiro de anuncios ou edictos poderá ser substituída ou complementada pola súa publicación na sede electrónica do organismo correspondente.

Esta lei dedica os seus artigos 10 e seguintes á dita sede electrónica, regulación xustificada pola necesidade de definir claramente a «sede» administrativa electrónica con que se establecen as relacións, promovendo un réxime de identificación, autenticación, contido mínimo, protección xurídica, accesibilidade, dispoñibilidade e responsabilidade.

Pola súa parte, o Real decreto 1671/2009, do 6 de novembro, polo que se desenvolve parcialmente a citada Lei 11/2007, do 22 de xuño, dispón no seu artigo 3.2 que as sedes electrónicas se crearán mediante orde do ministro correspondente ou resolución do titular do organismo público, que se deberá publicar no «Boletín Oficial del Estado» co contido mínimo nel establecido.

En cumprimento do previsto en tal artigo, mediante a Orde TIN/1459/2010, do 28 de maio, creouse a sede electrónica da Secretaría de Estado da Seguridade Social, entre cuxos contidos mínimos se prevé a inclusión do taboleiro de anuncios electrónico, no cal se publicarán, se é o caso, os actos e comunicacións que se deben publicar no taboleiro de anuncios ou edictos convencional, indicando o carácter substitutivo ou complementario deste.

Neste contexto, a nova disposición adicional quincuaxésima do texto refundido da Lei xeral da seguridade social, aprobado polo Real decreto legislativo 1/1994, do 20 de xuño, regula as notificacións dos actos administrativos no ámbito da Seguridade Social por medios electrónicos.

No seu punto 4, e para o caso de que tales notificacións non se puidesen realizar na sede electrónica da Seguridade Social ou no domicilio do interesado, de se daren os supostos previstos no artigo 59.5 da Lei 30/1992, do 26 de novembro, prevese a práctica das notificacións exclusivamente a través do taboleiro de edictos e anuncios da Seguridade Social, xestionado pola Secretaría de Estado da Seguridade Social, nos termos que se determinen por orde do Ministerio de Trabajo e Inmigración.

O obxectivo desta orde son facer efectiva esa previsión e dar cumprimento ao mandato legal, establecendo a xestión e funcionamento e a publicación no taboleiro, así como os efectos dos actos administrativos, comunicacións e anuncios emitidos pola Administración da Seguridade Social en exercicio das súas competencias, e de calquera outra información de interese xeral, publicados no dito taboleiro.

Do seu contido cabe destacar a unidade de taboleiro para toda a Administración da Seguridade Social e o carácter universal e gratuíto da súa consulta, mediante a súa accesibilidade tanto a través da internet como nas oficinas de atención ao público da Administración da Seguridade Social.

Sobre esta orde emitiu informe a Comisión Ministerial de Administración Electrónica do Ministerio de Trabajo e Inmigración, conforme o disposto no artigo 2.1.f) e g) da Orde TIN/3644/2009, do 29 de decembro, pola que se regulan a composición e funcións da citada comisión.

Así mesmo, emitiu informe a Axencia Española de Protección de Datos, de acordo co disposto no artigo 5.b) do Estatuto da citada axencia, aprobado polo Real decreto 428/1993, do 26 de marzo.

Esta orde dítase en uso das atribucións conferidas para o efecto pola disposición adicional quincuaxésima.4 do texto refundido da Lei xeral da seguridade social, aprobado polo Real decreto legislativo 1/1994, do 20 de xuño.

Na súa virtude, logo de aprobación do vicepresidente terceiro do Goberno e ministro de Política Territorial e Administración Pública, de acordo co Consello de Estado, dispoño:

Artigo 1. *Obxecto.*

1. Esta orde ten por obxecto regular o taboleiro de edictos e anuncios da Seguridade Social, incluído na sede electrónica da Secretaría de Estado da Seguridade Social, como medio oficial de publicación, a través de edictos, das notificacións dos actos administrativos ditados no ámbito da Seguridade Social, nos seguintes supostos:

- a) Cando os interesados no procedemento sexan descoñecidos.
- b) Cando se ignore o lugar da notificación ou o medio polo que se debe practicar.
- c) Cando, intentada a notificación na sede electrónica da Seguridade Social ou no domicilio dos interesados, esta non se puidese practicar.

2. Así mesmo, o taboleiro de edictos e anuncios da Seguridade Social servirá como medio de publicación dos anuncios, acordos, resolucións e comunicacións emitidos pola Administración da Seguridade Social en exercicio das súas competencias, e de calquera outra información de interese xeral da dita Administración. Esta publicación terá carácter complementario con relación a aqueles actos en que unha norma exixa a súa publicación por outros medios.

3. A publicación no taboleiro de edictos e anuncios da Seguridade Social terá a consideración de oficial e auténtica, de acordo coas normas e condicións que se establecen nesta orde.

Artigo 2. *Ámbito subxectivo.*

Para os efectos desta orde, entenderase por Administración da Seguridade Social a totalidade das direccións xerais, entidades xestoras e servizos comúns incluídos no ámbito de aplicación da sede electrónica da Secretaría de Estado da Seguridade Social, de conformidade co artigo 2.a) da Orde TIN/1459/2010, do 28 de maio, creadora da dita sede.

Artigo 3. *Características do taboleiro de edictos e anuncios da Seguridade Social.*

1. O taboleiro de edictos e anuncios da Seguridade Social será único para toda a Administración da Seguridade Social, terá formato dixital e axustarase ás especificacións que se establecen nesta orde, así como ás condicións establecidas na Lei 11/2007, do 22 de xuño, de acceso electrónico dos cidadáns aos servizos públicos, e na súa normativa de desenvolvemento.

2. O taboleiro estará accesible as 24 horas do día e de forma gratuíta na sede electrónica da Secretaría de Estado da Seguridade Social, nos termos que se indican no artigo 13.

3. A publicación no taboleiro de edictos e anuncios da Seguridade Social respectará os principios de accesibilidade e facilidade de uso, de acordo coas normas establecidas ao respecto, utilizará estándares que sexan de uso xeneralizado polos cidadáns cunha constante adaptación ao progreso tecnolóxico.

En particular, terá as condicións de accesibilidade que faciliten a súa consulta polas persoas con discapacidade ou de idade avanzada, conforme o establecido no Regulamento sobre as condicións básicas para o acceso das persoas con discapacidade ás tecnoloxías, produtos e servizos relacionados coa sociedade da información e medios de comunicación social, aprobado polo Real decreto 1494/2007, do 12 de novembro.

Artigo 4. Garantías do taboleiro de edictos e anuncios da Seguridade Social.

Corresponde á Xerencia de Informática da Seguridade Social:

- a) Garantir a dispoñibilidade do taboleiro de edictos e anuncios da Seguridade Social así como a autenticidade e integridade do contido que nel se publique, mediante o emprego dos sistemas de sinatura electrónica relacionados nos artigos 18 e 19 da Lei 11/2007, do 22 de xuño.
- b) Velar para que reúna as condicións de accesibilidade necesarias para a súa consulta polas persoas con discapacidade ou de idade avanzada e a súa permanente adaptación ao progreso tecnolóxico.
- c) Publicar na sede electrónica da Secretaría de Estado da Seguridade Social as prácticas e procedementos necesarios para a efectividade do previsto neste artigo.
- d) Garantir a xeración de evidencias electrónicas que permitan a constatación da data e da hora de publicación no taboleiro de edictos e anuncios da Seguridade Social dos edictos, anuncios e demais actos e información, para efectos da súa oportuna acreditación posterior.

Artigo 5. Características dos edictos, anuncios e demais actos e información que se van publicar.

1. Na cabeceira de cada edicto, anuncio e dos demais actos e información a que se refire o artigo 1.2 figurará:

- a) O escudo de España.
- b) A denominación «Taboleiro de edictos e anuncios da Seguridade Social».
- c) O logotipo do taboleiro de edictos e anuncios da Seguridade Social, que será «TEASS».
- d) O número de páxina.

En cada edicto, anuncio e demais actos e información figurará, ademais, a identificación do órgano ou unidade que o emite e ordena a súa publicación, de acordo co establecido no artigo 6.

2. Os edictos, anuncios e demais actos e información conterán tamén unha representación da sinatura electrónica realizada con motivo da súa publicación no taboleiro de edictos e anuncios da Seguridade Social, que será visible tanto en formato electrónico como en papel e que incluírá, cando menos, a identificación do órgano ou unidade asinante e a data en que se produciu tal publicación.

Artigo 6. Competencia para ordenar a publicación.

As direccións xerais dependentes da Secretaría de Estado da Seguridade Social así como os órganos e unidades centrais e provinciais das entidades xestoras e servizos comúns da Seguridade Social, adscritos á dita Secretaría de Estado que, de conformidade coas súas respectivas competencias, estean lexitimados para a emisión dos edictos, anuncios e demais actos e información a que se refire o artigo 1.2 serán os competentes para ordenar a súa publicación no taboleiro de edictos e anuncios da Seguridade Social.

Artigo 7. Responsable dos contidos.

Serán responsables dos contidos dos edictos, anuncios e demais actos e información postos á disposición dos cidadáns no taboleiro de edictos e anuncios os titulares dos órganos e unidades emisores do acto publicado.

Artigo 8. *Competencia para a publicación.*

A publicación no taboleiro de edictos e anuncios da Seguridade Social dos edictos, anuncios e demais actos e información a que se refire o artigo 1.2 corresponderá á Xerencia de Informática da Seguridade Social, en canto organismo competente para a xestión tecnolóxica da sede electrónica da Secretaría de Estado da Seguridade Social.

Artigo 9. *Prazo de publicación dos edictos.*

1. Os edictos manteranse publicados no taboleiro de edictos e anuncios da Seguridade Social durante un prazo de 20 días naturais.

Para efectos do cómputo de tal prazo, a data de publicación será a que apareza na representación visual da sinatura electrónica do documento, descrita no artigo 5.2.

2. A sincronización da data e da hora, para efecto do cómputo dos prazos que corresponda, realizarase conforme o previsto no artigo 15 do Real decreto 4/2010, do 8 de xaneiro, polo que se regula o Esquema Nacional de Interoperabilidade no ámbito da Administración electrónica.

Artigo 10. *Efectos da publicación de edictos.*

A publicación no taboleiro de edictos e anuncios da Seguridade Social dos edictos correspondentes a notificacións dos actos administrativos ditados no ámbito da Seguridade Social, nos supostos a que se refire o artigo 1.1, producirá efectos de notificación aos interesados sen que sexa necesaria a súa publicación en ningún outro taboleiro edictal ou boletín oficial ningún.

Nestes casos, transcorridos 20 días naturais desde a publicación do edicto no taboleiro, entenderase que a notificación foi practicada, e darase por cumprido o dito trámite e continuarase o procedemento, sen prexuízo de que o edicto siga estando accesible no taboleiro durante o prazo sinalado no artigo seguinte.

Así mesmo, finalizado o prazo de 20 días naturais de publicación, iniciarase o cómputo dos prazos para a interposición das reclamacións e recursos que procedan.

Artigo 11. *Prazo de exposición dos edictos.*

Finalizado o prazo de publicación de 20 días naturais establecido no artigo 9, o edicto seguirá estando accesible durante un ano, para efectos da súa consulta, no taboleiro de edictos e anuncios da Seguridade Social.

Unha vez transcorrido este prazo, unicamente se facilitará a información contida no edicto ao propio interesado ou ao seu representante así como ao Defensor do Pobo, aos xuíces e tribunais, ao Ministerio Fiscal e á Axencia Estatal de Administración Tributaria ou órganos equivalentes da Administración autonómica e local.

Artigo 12. *Prazos e efectos doutras publicacións.*

O prazo de publicación ou de exposición, se é o caso, e os efectos da publicación dos anuncios e demais actos e información a que se refire o artigo 1.2 serán, en cada caso, os que determine o órgano competente para ordenar a súa publicación.

Artigo 13. *Acceso dos cidadáns ao taboleiro de edictos e anuncios da Seguridade Social.*

1. O acceso dos cidadáns ao taboleiro de edictos e anuncios da Seguridade Social, a través da sede electrónica da Secretaría de Estado da Seguridade Social, non precisará de identificación ningunha.

A localización dos edictos publicados no taboleiro, así como a súa recuperación e impresión, tanto dos que se encontren dentro do prazo de publicación como daqueles en que o dito prazo concluíu, así como dos anuncios e demais actos e información que se publiquen nel, efectuarase mediante un sistema de busca avanzado que contará cos

mecanismos necesarios para evitar a indexación e recuperación automática de publicacións a través de motores de busca desde a internet.

Cando por medio de edictos se publiquen notificacións que conteñan sancións administrativas, a información obtida como consecuencia da súa consulta no taboleiro unicamente poderá ser conservada e almacenada pola Administración da Seguridade Social, polo propio interesado ou a persoa que este autorizase e polas administracións públicas que por lei o teñan autorizado, resultando nos restantes casos contraria ao disposto no artigo 7.5 da Lei orgánica 15/1999, do 13 de decembro, de protección de datos de carácter persoal.

2. En todas as oficinas de atención ao público da Administración da Seguridade Social facilitarase a consulta pública e gratuíta do taboleiro de edictos e anuncios da Seguridade Social.

Disposición adicional primeira. *Protección de datos de carácter persoal.*

1. O funcionamento, a xestión e a publicación de edictos no taboleiro de edictos e anuncios da Seguridade Social realizarase conforme o disposto na Lei orgánica 15/1999, do 13 de decembro, de protección de datos de carácter persoal, no seu regulamento de desenvolvemento, aprobado polo Real decreto 1720/2007, do 21 de decembro, así como no resto da normativa que lle sexa de aplicación.

2. Para efectos do disposto na citada normativa, a Secretaría de Estado da Seguridade Social terá a condición de responsable do ficheiro.

Cada unha das direccións xerais, entidades xestoras e servizos comúns a que se refire o artigo 2 terá a condición de responsable do tratamento dos datos correspondentes aos edictos, anuncios e demais actos e información cuxa publicación no taboleiro de edictos e anuncios da Seguridade Social sexa ordenada polos seus órganos e unidades centrais ou provinciais.

Disposición adicional segunda. *Creación de ficheiro de datos de carácter persoal.*

Créase o ficheiro de datos de carácter persoal taboleiro de edictos e anuncios da Seguridade Social.

a) Finalidade do ficheiro: xestión do taboleiro de edictos e anuncios da Seguridade Social.

b) Usos previstos: xestión da publicación, a través de edictos, das notificacións dos actos administrativos no ámbito da Seguridade Social, así como da publicación de anuncios, acordos, resolucións e comunicacións emitidos pola Administración da Seguridade Social e de calquera outra información de interese xeral da dita Administración.

c) Persoas ou colectivos dos cales se obteñen os datos ou que resulten obrigados a subministralos: interesados aos que se notifica mediante edictos.

d) Procedemento de recollida dos datos: aplicacións informáticas establecidas para o efecto.

e) Estrutura básica do ficheiro e descrición dos datos recollidos: contén os datos dos interesados aos que son notificados mediante os edictos, nome e apelidos ou razón social, código de conta de cotización, número de Seguridade Social, DNI, NIE ou CIF, así como o resto dos datos de tales edictos.

f) Sistema de tratamento: automatizado.

g) Cesións de datos previstas: conforme o previsto nesta orde, os edictos permanecerán accesibles a terceiros durante o prazo dun ano; transcorrido o dito prazo, unicamente poderán acceder aos seus datos o Defensor do Pobo, os xuíces e tribunais, o Ministerio Fiscal e a Axencia Estatal de Administración Tributaria ou órganos equivalentes da Administración autonómica e local.

h) Transferencias internacionais previstas a países terceiros: non se prevén.

i) Órgano responsable do ficheiro: Secretaría de Estado da Seguridade Social.

j) Órgano ante o cal se poden exercer os dereitos de rectificación, cancelación e oposición: Secretaría de Estado da Seguridade Social, rúa Agustín de Bethencourt 4, 28003 Madrid.

k) Medidas de seguridade: nivel medio.

Disposición adicional terceira. *Implantación do taboleiro de edictos e anuncios da Seguridade Social.*

A implantación efectiva da publicación no taboleiro de edictos e anuncios da Seguridade Social dos edictos correspondentes ás notificacións dos actos administrativos ditados no ámbito da Seguridade Social, nos supostos a que se refire o artigo 1.1, así como dos anuncios e demais actos e información a que se refire o artigo 1.2, emitidos pola Administración da Seguridade Social en exercicio das súas competencias, terá lugar o día de entrada en vigor desta orde.

Disposición derradeira primeira. *Título competencial.*

Esta orde dítase ao abeiro do disposto no artigo 149.1.17.^a da Constitución española, que atribúe ao Estado a competencia exclusiva en materia de réxime económico da Seguridade Social.

Disposición derradeira segunda. *Facultades de aplicación e desenvolvemento.*

Autorízase o secretario de Estado da Seguridade Social para que, mediante resolución, dite cantas disposicións sexan necesarias para o desenvolvemento e execución do previsto nesta orde.

Disposición derradeira terceira. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 8 de abril de 2011.—O ministro de Traballo e Inmigración, Valeriano Gómez Sánchez.